

gepractiret gehabt. Darauff dann das zum meh-  
 rern mal erfolgt ist/ daß/wann es zum treffen kom-  
 men/nicht allein / viel tausendt Menschen / weil sie  
 nemlich des Kriegens vnerfahren gewesen / jäm-  
 merlicher Weise hingerichtet/ sondern auch biswei-  
 len Landt vnd Leuthe/ Bestung vnd Stätte schänd-  
 lich verlohren / vnd dem Feindt zu theyl worden.  
 Welches dann (Menschlich davon zu reden) nicht  
 geschehen were / wann so wol die Feldt Obersten/  
 vnd andere Befelchshabere / als auch ihr gehabtes  
 Kriegsvolck die Kriegskunst zuvor gelehret vnd  
 geübet hetten.

Nun solchem groben vnd schädlichen Miß-  
 brauch/ Vnordnung vnd Fehlen zu remediren vnd  
 abzuheffen / were ja auff dieser Welt kein besser o-  
 der heylsamer Mittel/ als daß/ wie gemelt/ ein wol-  
 regulirte Kriegsschul / irgendswo in Teutsch = als  
 vnserm gemeinen Vaterlandt / angerichtet vnd  
 gehalten würde.

Dieweil aber darzu / noch zur Zeit / keine ap-  
 parence oder Anzeng/ viel weniger einige esperan-  
 ce oder Hoffnung ist / alldieweil der meynste theyl  
 in grosser Sicherheit lebet/ vnd wenig deren gefun-  
 den werden/ die sich vmb das gemeine Beste in dem  
 Fall bekümmern / ja deren viel seyndt / die solche  
 vnd dergleichen Sachen von geringer Importantz  
 achten/

B

achten/